

## **Informacija o potpisivanju**

### **Memoranduma o razumijevanju između Ministarstva vanjskih poslova Crne Gore i Ministarstva vanjskih poslova Federativne Republike Brazil o uspostavljanju političkih konsultacija o pitanjima od zajedničkog interesa.**

Predmetni Memorandum o razumijevanju između Ministarstva vanjskih poslova Crne Gore i Ministarstva vanjskih poslova Federativne Republike Brazil o uspostavljanju političkih konsultacija o pitanjima od zajedničkog interesa dostavljen je posredstvom Ambasade Federativne Republike Brazil u Beogradu, u okviru inicijative održavanja prvih političkih konsultacija između dva resora vanjskih poslova. Budući da su odnosi Crne Gore i Federativne Republike Brazil prijateljski i otvoreni, cijenimo ovu inicijativu kao dobru osnovu za unaprijeđenje sveukupne saradnje.

Ovim Memorandumom o razumijevanju predviđa se jačanje prijateljskih veza između dvije države; periodične konsultacije o bilateralnim, regionalnim i multilateralnim pitanjima od zajedničkog interesa; uspostavljanje praktičnog i efikasnog mehanizma za konsultacije o pitanjima od zajedničkog interesa; iznalaženje trajnih i pravednih rješenja za savremene međunarodne probleme.

Memorandum bi, u ime crnogorske strane potpisao Čedomir Fušić, v.d. generalnog direktora Generalnog direktorata za bilateralne poslove i ekonomsku i kulturnu diplomatiju, a u ime brazilske strane Eduardo Boteljo Barboza, ambasador Federativne Republike Brazil u Crnoj Gori, sa sjedištem u Beogradu. Potpisivanje Memoranduma planirano je za 23. februar 2022.

**MEMORANDUM O RAZUMIJEVANJU  
IZMEĐU  
MINISTARSTVA VANJSKIH POSLOVA CRNE GORE I  
MINISTARSTVA VANJSKIH POSLOVA FEDERATIVNE REPUBLIKE BRAZIL  
O USPOSTAVLJANJU POLITIČKIH KONSULTACIJA O PITANJIMA OD  
ZAJEDNIČKOG INTERESA**

Ministarstvo vanjskih poslova Crne Gore i Ministarstvo vanjskih poslova Federativne Republike Brazil, u daljem tekstu: "Strane";

**ZAINTERESOVANI** za njegovanje i jačanje prijateljskih veza između dvije države;

**SMATRAJUĆI** da su dijalog i saradnja ključni za vanjsku politiku obje zemlje;

**UZIMAJUĆI U OBZIR** zajednički cilj iznalaženja trajnih i pravednih rješenja za savremene međunarodne probleme;

**UVJERENI** u važnost uspostavljanja praktičnog i efikasnog mehanizma za konsultacije o pitanjima od zajedničkog interesa;

**RUKOVOĐENI** Bečkom konvencijom o diplomatskim odnosima od 18. aprila 1961. godine;

Dogovorili su sljedeće:

1. Strane će se sastajati periodično budući da smatraju potrebnim da sprovedu konsultacije o bilateralnim, regionalnim i multilateralnim pitanjima od zajedničkog interesa.

2. Konsultacije će se odvijati naizmjenično u Crnoj Gori i u Federativnoj Republici Brazil. Nivo, datumi i dnevni red sastanaka biće unaprijed utvrđeni, diplomatskim putem.

3. Strane mogu pozvati na konsultacije, uz obostranu saglasnost, stručnjake ili predstavnike relevantnih institucija, u zavisnosti od prirode pitanja koja bude trebalo analizirati tokom konsultacija.

4. Ovaj Memorandum o razumijevanju će dopuniti već postojeće kanale komunikacije između Strana i intenzivirati dijalog uspostavljen diplomatskim kanalima.

5. Obje Strane će zaštititi sadržaj i zaključke konsultacija u skladu sa svojim zakonima.

6. Ovaj Memorandum o razumijevanju nije pravno obavezujući i ne stvara prava, obaveze ili odgovornosti za Strane. Primjena ovog Memoranduma o razumijevanju i svaka aktivnost u njegovom okviru biće u skladu sa nacionalnim zakonodavstvom, pravilima i procedurama Strana.

7. Saradnja na osnovu ovog Memoranduma o razumijevanju neće uticati na prava i obaveze Strana u skladu sa drugim međunarodnim sporazumima.

8. Svaki spor u vezi sa tumačenjem ili primjenom ovog Memoranduma o razumijevanju rješavaće se direktnim pregovorima između Strana.

9. Ovaj Memorandum o razumijevanju stupa na snagu danom potpisivanja i ostaje na snazi neograničeno vrijeme.

10. Svaka Strana može da raskine ovaj Memorandum o razumijevanju u bilo kom trenutku dostavljanjem pisanog obavještenja diplomatskim putem. Prestanak važenja stupa na snagu šest (6) mjeseci nakon datuma prijema pisanog obavještenja o tome. Prestanak važenja ovog Memoranduma o razumijevanju neće uticati na zaključke o aktivnostima u okviru saradnje, dogovorene tokom perioda njegovog važenja.

11. Ovaj Memorandum o razumijevanju može biti izmijenjen u bilo kom trenutku uzajamnom pisanom saglasnošću Strana, formalizovanom pisanom komunikacijom, u kojoj se mora jasno navesti datum stupanja amandmana na snagu.

Potpisan u \_\_\_\_\_, dana \_\_\_\_\_, u po dva originalna primjerka na crnogorskom, portugalskom i engleskom jeziku, pri čemu su svi tekstovi jednako vjerodostojni. U slučaju razlika u tumačenju, mjerodavan je tekst na engleskom jeziku.

**ZA MINISTARSTVO VANJSKIH  
POSLOVA CRNE GORE**

---

**Ime**

*titula*

**ZA MINISTARSTVO VANJSKIH  
POSLOVA FEDERATIVNE REPUBLIKE  
BRAZIL**

---

**Ime**

*titula*